

## Decanatus

M<sup>r</sup>. Ludovici claudii Bourdetins

a Die tertîa mensis Novembris anni 1736  
ad Diem Octavam mensis Novembris 1738.





DEO OPTIMO MAX.

UNI ET TRINO.

VIRGINI DEIPARÆ, ET S. LUCE  
Orthodoxorum Medicorum Patrono.



## QUÆSTIO MEDICA,

QUODLIBETARIIS DISPUTATIONIBUS  
*manè discutienda, in Scholis Medicorum, die Jovis decimâ-quintâ  
Novembris, anno M. DCC. XXXVI.*

M. CAROLO PAYEN,  
Doctore Medico, Præfide.

*Est-ne eadem in ossibus, quæ in aliis partibus nutritionis ratio?*

I.



UTRITIO est illa incrementi species, quæ partes tum in longum, tum in latum extenduntur, & appositæ atque accretæ ad interiores vasorum parietes materia firmantur. Huic operi assidue & indefinenter allaborat Natura, successu vario pro diversâ ætate. Quovis tempore eadem est operationis ratio. Effectus diversitas pendet à diversâ liquidorum vi, diversoque solidorum renixu. In crescentibus, solidæ partes, molles ac teneræ, fluidorum impulsui cedunt. Tunc ab adjectis particulis nutritiis vasa elongantur, ampliantur. Continuata nutritione solidis partibus firmitas accedit,

quæ aucta sensim eo progreditur, ut fluidorum impulsui æquivalet. Tunc ultima vascula non amplius dilatantur, elonganturve, sed appposito nutrimento impleri occipiunt. Sic quod prius vas erat ex pluribus fibris contextum, evadit fibra unica, ideoque fortior: & in hoc statu, quem *consistentia* appellare liceat, partes non crescunt amplius. Jugi tamen nutritione, novis semper coalescentibus vasculis, addensæ fibræ roborantur in dies, & totius corporis vigor augetur, donec compluribus vasorum ramulis oppletis, nimium solidatæ fibræ, jam non flexiles, rigidæ evadant. Tunc decrescunt vires, status est *decidentia*, qui in mortem mere naturalem definit, quum ubique indurata solida, liquidis præpollent, iisque vias intercludunt. Ultima ergo vascula primum occalescunt. Sic in minimis vasis totum nutritionis opus peragitur: sententia quidem oppugnata non semel, sed cui fidem facit expositus jam incrementi progressus. Certe nutritias particulas non irruere, sed allabi necesse est. Citatori motu in majoribus vasis liquida aguntur. Ad hæc, ut majus vas nutriatur, minora, ex quibus componitur, vasa nutrirî sufficit. Atque nonnisi per minutissima vascula vegetabilia aluntur. Jam in nutritione tria consideranda sunt: nutritii succi indoles, nutriendarum partium natura, nutrimenti appositio & accretio.

## I I.

QUISQUIS nutritionis opus sub triplici hoc respectu perpendere non studuerit, in errorem delabatur. Fuerunt nonnulli qui de succo nutritio nihil curarent. Partium incrementum duxerunt à simplici, quod aiunt, vasorum evolutione: ipsamque nutritionem à sola eorumdem repletione, novo semper influente humore, nec ullibi adhærescente. Porro huic opinioni observatio refragatur. Cresceret quidem Embryo ex simplici evolutione; sed nulla crescenti firmitas accederet. Evoluta autem vascula solo cujusvis liquoris influxu repleri quidem possunt, sed non crassescere tunica; imo molliores fierent, prout vascula evolverentur magis. Nec in sene fibræ, quam in fœtu, duriores observarentur: è contra in Embryone nondum evolutæ partes, pressiores proinde, longe forent durissimæ. Forent inutilia prorsus tot diversa alimentorum genera. Vasa, quibus, ut essent nutrita, sufficeret repleri influente humore quolibet, solo simplicis aquæ haustu probe nutricarentur. Habenda itaque succi nutritii ratio. Neque succus quilibet sustentandis partibus idoneus est. Solus ille pro nutritio haberi posse videtur, qui in tenuissimum rorem resolvi aptus, condescere nihilominus potest, & solidari. Quale observatur in formatione pulli *colliquamentum*. Nunc, nisi partium nutriendarum natura inquiretur, vix poterit error declinari. Sic, qui harum partium nullum discrimen fecere\*, eo usque rapti sunt, quo, dum nutritionem ubique peragi asserunt, fateri cogantur esse in felle, urina, aliisque excrementis, unde cystis fellea, vesica, &c. possint nutrirî; ipsamque ærem partibus suis ramosis & flexilibus, reparandis vesiculis pneumonicis non tam alienum esse, ac prima fronte videtur. Denique ut compleatur nutritionis idea, indagare oportet, quomodo alibilis materia intimis vasis apponatur, & accrescat. Secus, expugnata jam, de sola ad nutritionem vasorum repletionem, opinio redibit. Quum igitur ex recensitis tribus capitibus, natura partium nutriendarum, succi nutritii indole, ejusdem appositione & accretione, tota nutritionis res conficiatur; consequens est, ibi eandem esse nutritionis rationem, ubi hæc tria eadem sunt.

\* Dissert.  
physiolog. de  
nutritione  
propugnata.  
Monspelii,  
anno 1727.  
Auct. D.  
HAGVENOT.

## III.

**A**TQUE ut eodem ordine aggrediamur, eadem est in ossibus, quæ in aliis partibus nutriendorum staminum natura. Id quidem prima fronte paradoxum. Veritati tamen consonum videbitur, si partes in incrementi sui primordiis considerentur. In Embryone vasculosa omnia, omnia mollia sunt: & ipsa ossium rudimenta, nullius videntur firmitatis. Progrediente vita, diversæ diversis in partibus mutationes fiunt. Quæ citius nutriuntur, solidantur citius. Annis labentibus, membranæ in cartilagine, cartilagine in ossa abeunt: neque membranarum aut cartilaginum naturam conciperet, qui has partes in tali *occellationis* statu consideraret. Ossa mature præ cæteris partibus à nutritione capiunt incrementum. Ergo ut in illis nutriendorum staminum natura cognoscatur, in prima sua mollitudine examinanda sunt. Tunc porro nullum inter quascunque partes discrimen observatur. Profecto ab eodem principio protenduntur omnes. Ex cerebro spinæque medulla prodeunt, & exporriguntur filamenta, ut reliquarum pattium, ita ossium proxima materies. His enim filamentis, cuncta ex æquo intertextuntur. Nervosa proinde omnia. Ergo ubique nutriendorum staminum natura eadem. Eadem etiam ubique alibilis succi indoles. Nam filamenta illa totidem sunt tubuli, quibus succus idem ad omnes omnino partes deferretur, eadem ratione applicandus; nisi quod promptius increscant quæ toti compagini fulcimentum præstituta sunt.

## IV.

**A**BSONUM non est è mucosis staminibus solidissima ossa exsurgere. Neque absonum tantam firmitudinem liquore per vascula adeo tenuia allato conciliari. Tenerrimum est Quercus nascentis germen. Tenuissima, & tubulorum nerveorum instar, insensilia vascula, quibus transmissio humoris durissima tantum acquirit stabilitatis. Imo ipsa vasorum exilitas ossium indurationi favet. Prout minora sunt vasa, multiplicantur superficies; atque propter maiorem affricum, liquor relentescit, in minimis hæsurus, nisi externo impulsu promoveatur. Ergo ubi vasis minimis pauca vel nulla maiora interposita sunt, facile in suo canaliculo congelascit humor. Hinc *ossificatio* ad vasorum fines incipit, longe à majoribus arteriarum ramis. In alicujus vasculi extremo succus concrevit: istud vasculi segmentum vasorum adjacentium pressione complanatur, jamque squamula nata est, allabenti à tergo humori obstaculum. Hæret de novo humor, conglutinatur cum vase; sicque successive à puncto in punctum, vas istud solidescit; pariterque crescit novarum squamularum series. Eodem modo res eadem pluribus in tubulis sese contingentibus peragitur. Sicque totum os compingitur è squamosis stratis. Neque tamen æqualem duritiem ossa omnia; imo nec ejusdem ossis partes singulæ, nanciscuntur. Ut neque eadem est in diversis ætatibus singulorum ossium soliditas. Hæc quippe tanto minor est, quanto plura inter osseas squamulas vascula adhuc aperta, & succo turgida remanent. Ideo in junioribus ossa omnia parum habent densitatis; ut & extrema ossium in adultis. Ideo in senibus ipsa ossium extrema densa sunt, nec fere ullibi diploë observatur. Ideo rursus in junioribus fracta ossa facile, in senibus vix ac ne vix quidem internato callo consolidantur. Omnia hæc quæ de ossibus hucusque dicta sunt, cum cæteris partibus conferantur. Notum est partes omnes in suo principio iisdem, quibus ossa, nervosis staminibus contextas fuisse. Constat ergo omnes universas eodem succo nutriri, qui modo non dissimili apponitur & accrescit.

**R**E quidem ipsa carnosæ partes in sua mollitie perseverant. At præterquam quod ipsæ carnes progrediente ætate rigescunt, mollitudinem propria textura conciliat. In illis nervosa stamina, numerosioribus & amplioribus vasis sanguineis distinguuntur; ipseque color sanguinis abundantiam arguit. Profecto, nisi à vasorum sanguineorum interstita multitudine nervosum subtemen raresceret, & nisi singulæ fibræ carneæ stillante ex adiposis cellulis lentore illinirentur, facile in osseam mutarentur soliditatem. Neque alia querenda est ratio cur cartilagine, ligamenta, tendones, periosteum, aliæque membranae in senio durescant. In illis siquidem partibus, nutrienda stamina, nervæ scilicet vasa, paucioribus distincta sanguineis, sibi invicem jugiter apprimuntur; ossæque naturæ tanto propiora sunt, quanto magis ad ossis contextum accedunt. In hoc igitur tota posita est diversitatis ratio, quod ossa celerius, carnes tardius ad nutritionis statum perducantur. Idecirco maturius rigidantur ossa; atque, si dicere fas sit, maturius moriuntur. Nempe superstitute adhuc in partibus mollibus vitæ motu, ossa non vivunt amplius. Ne tamen ante tempus rigidescerent, illorum laxitates oleoso liquore intruxit Natura. Unguen istud squamularum interstitia subit & occupat; sic præcavet fragilitas, cui obnoxia fiunt ossa, quando medulla absunta aut depravata est. Eadem est igitur in ossibus, quæ in aliis partibus nutriendorum staminum natura; idem alibilis succus, qui eodem modo, licet citius, apponitur & accrescit.

*Ergo eadem est in ossibus, quæ in aliis partibus nutritionis ratio.*

#### DOMINI DOCTORES DISPUTATURI.

*M. Carolus Payen,  
Agius præses.*

*M. Gaspar Cochoy Dupuy,  
in Arce Maritimâ Rupifor-  
tensi, Anatomæ, & Chirurgiæ  
Professor Regius.*

*M. Ludovicus Lemery, Me-  
dicus Regis Ordinarius, Re-  
giæque Scientiarum Acade-  
miæ Socius, & in Horto  
Regio Chymici Professor.*

*M. Henricus Guyot.*

*M. Jacobus - Franciscus Van-  
dermonde.*

*M. Petrus le Tonnelier.*

*M. Tuffanus - Gilbertus  
Bonlland.*

*M. Adrianus Malaval.*

*M. Nicolaus Andry, antiquæ  
Facultatis Decanus & Le-  
ctor Regius.*

Proponebat Parisiis, JOANNES MIDY, Lemovicensis,  
Baccalaureus Medicus A. R. S. H. 1736.  
à sexta ad meridiem.